

DOMENIE I DI AVENT

Antifone di jentrade cf. Sal 24,1-3

A ti, Signôr, o alci la mê anime,
Diu gno, o met in te la mê sperance: che no mi tocji di pintîmi.
Che no vedin di sghignî ducj i miei nemîs.
Chei che a sperin in te no restaran deludûts.

No si dîs Glorie a Diu.

Colete

Diu onipotent,
dàur ai tiei fedêi di lâi incuintri cu lis oparis de justizie
al to Crist che al sta rivant,
par podê sentâsi a la sô diestre e gjoldi il ream dai cîi.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 2,1-5

Il Signôr al dà dongje ducj i popui inte pâs eterne dal so ream.
Dal libri dal profete Isaie
Vision che al à vude Isaie, fi di Amos, sun Jude e sun Jerusalem.
Al sucedarà che tai tims a vignî
la mont de cjase dal Signôr
e sarà stabilide su la spice des monts
e si alçarà sù parsore dai cuei.
Ducj i forescj a coraran di jê,
e a vignaran un grum di popui disint:
«Vignît, anîn su la mont dal Signôr,
tal templi dal Diu di Jacop,
par che nus insegni lis sôs stradis
e che o podìn lâ indenant pai siei trois».
Parcè che di Sion e vignarà fûr la leç
e di Jerusalem la peraule dal Signôr.
Lui al sarà judiç tra i forescj
e al deciderà di une vore di popui.
A mudaran lis lôr spadis in sapis
e lis lôr lancis in falcets;
une gjernazie no alçarà la spade cuintri di un'altre
e no praticaran plui la vuere.
Cjase di Jacop, vignît,
anîn indenant te lûs dal Signôr!
Peraule di Diu.

SALM RESPONSORIÂL dal Salm 121

R. Anîn contents incuintri al Signôr.
Ce ligrie cuant che mi àn dite:
«O larin te cjase dal Signôr».
I nestris pîts bielzà si cjatin,
Jerusalem, dentri des tôs quartis! **R.**

Là sù lis tribùs a levin,
lis tribùs dal Signôr,
seont la leç che Israel al à vude
di laudâ là sù il non dal Signôr.
Là sù a son prontadis lis sentis de justizie,
lis sentis de cjase di David. **R.**

Bramait la pâs a Jerusalem:
chei che ti vuelin ben che a vedin furtune!
Che e sedi pâs jenfri des tôs muris,
jenfri dai tiei palaçs bondance. **R.**

Par amôr dai miei amîs e dai miei fradis
o disarai: «Che pâs ti compagni!».
Par amôr de cjase dal Signôr, nestri Diu,
o domandarai: «Che il ben tu gjoldis!». **R.**

SECONDE LETURE Rm 13,11-14a

La nestre salvece e je dongje.

De letare di san Pauli apuestul ai Romans

Fradis, al è za rivât par vualtris il timp di dismovisi de sium; di fat cumò la nestre salvece e je plui dongje di cuant che o vin dit di sì a la fede. La gnot e je indenant, il dì al è daûr a cricâ. Alore butìn di bande lis oparis dal scûr e vistînsi des armis de lûs. Compuartînsi cu la dignitât che al à di vê chel che al opere in plen dì: no cun baldoriis e cun cjochis, no cun sporçjetâts e cun robatis, no cun barufis e cun gjelosiis. Vistîtsi invezit dal Signôr Jesù Crist.

Peraule di Diu.

CJANT AL VANZELI Sal 84,8

R. Aleluia, aleluia.

Mostrinus, Signôr, la tô misericordie,
e danus la tô salvece.

R. Aleluia.

VANZELI Mt 24,37-44

Veglait, par jessi pronts cuant che al vignarà.

Dal vanzeli seont Matieu

In chê volte, Jesù al disè ai siei dissepui: «Come che al è sucedût tal timp di Noè, cussì e sarà la vignude dal Fi dal om. Di fat, come che tai dîs prin dal diluvi la int e mangjave, e beveve, si sposave e si maridave, fin a la dì che Noè al jentrà ta l'arcje, e no volerin crodi fin che nol plombà jù il diluvi e ju netà vie ducj, propit cussì al sarà a la vignude dal Fi dal om. In chê volte, se a saran in doi te campagne, un al sarà gafât e chel altri lassât stâ; se dôs feminis a saran daûr a masanâ cu la muele, une e sarà gafade e chê altre lassade stâ.

Veglait duncje, parcè che no savès in ce dì che al ven il vuestri Signôr. Tignît a ments chest: se il paron di cjase al savès in ce ore de gnot che al ven il lari, al veglarès e no si lassarès fiscâ la cjase. Par chel ancje vualtris tignîtsi pronts, parcè che te ore che no crodês al ven il Fi dal om».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti presentìn

e che ju vin vûts de tô bontât
e fâs che al deventi un premi di redenzion eterne
ce che tu nus lassis fâ cun devozion in cheste vite.
Par Crist nestri Signôr.

Antifone a la comunion Sal 84,13

Il Signôr nus darà ogni ben di sorte
e e butarà il so prodot la nestre tiere.

Daspò de comunion

Che nus zovin, Signôr, i misteris che o vin celebrâts,
e nus insegnin, a nô pelegriins su la tiere,
a volê ben a lis realtâts dal cîl
e a restâ grampâts dome a chês che a durin par simpri.
Par Crist nestri Signôr.